

"Identità te vedrina"

I comerciant de duta Fascia, protagonisc de l'Aisciuda Ladina 2011, i arà l met de meter fora simboi de noscia identità



Per l'Aisciuda Ladina i comerciant é envié a fornir sù sia vedrines con segnes de noscia identità, e l'é stat enjignà ence de bela tasces de papier con la paroles per fascian.

Dai 3 ai 7 de mé del 2011, en ocajon de l'Aisciuda ladina - festa del lengaz, l Comun General de Fascia, ensema con l'Union di Ladins de Fascia, l'Istitut cultural "majon di fascegn" e la Scola ladina, met a jir na scomenzadiva che vel slarièr fora te vigni setor de la sozietà fascèna l valor de esser na mendranza linguistica viva e sciantiva. Ajache noscia identità pel esser dalbon piena demò se la é bona de conjobièr

noscia cultura, lengaz e tradizions con la realtà sozioeconomica, turistica, comercièla e artejanèla che caraterisea l teritorie fascian, dò la Scola e l'hotelarià, chest an se à pissà de ge dedichèr chesta festa soraldut a artejegn e boteghieres fascegn.

Te chela setemèna donca duc i boteghieres é envié a fornir sù na vedrina de sia boteiga, o amàncol n cianton, con simboi de l'identità ladina. A chi che tol sù l'envit ge

vegn sport na bandiera ladina dai trei colores e l logo de la manifestazion.

Amò apede per l'ocajon l Comun General à fat fèr de bela tasces de papier dutes da dessegn e color, con su 99 paroles per fascian che revèrda l'ambient che aon entornvìa. I boteghieres che tol sù l'envit ciaparà 50 tasces debant.

Fora per la setemèna de l'Aisciuda Ladina i raprejentanc di enc organisadores de l'event jirà stroz a veder e tor jù la vedrines de la boteighes che se à enscinuà, che les vegnarà uzèdes fora sui sfoes ladins e su la televijion desche ejempies de partegnuda a noscia comunanza ladina.

Per aer maor informazions e per se enscinuèr e tor pèrt a "l'identità te vedrina" se pel se oujer a la Union di Ladins de Fascia, Str. De la Pieif 10, Sèn Jan - Vich tel. 0462.764545 o la direzion mail: union@ladinsdefascia.it dant da en jebia ai 28 de oril.